

NO. SOALAN: 135

PEMBERITAHUAN PERTANYAAN BAGI BUKAN JAWAB LISAN

DEWAN RAKYAT

PERTANYAAN : BUKAN LISAN

DARIPADA : DATUK ROZMAN BIN ISLI (LABUAN)

RUJUKAN : 9429

SOALAN :

Datuk Rozman bin Isli [Labuan] minta MENTERI DALAM NEGERI menyatakan apakah langkah awal telah Kementerian ambil supaya dapat menjamin keselamatan negara selamat daripada ancaman pengganas IS/DAESH serta berapakah jumlah pengganas yang telah dikenalpasti dan diambil tindakan supaya keselamatan rakyat sentiasa terjaga daripada ancaman pengganas.

JAWAPAN:

Bagi usaha memerangi keganasan, Kementerian Dalam Negeri melalui Polis Diraja Malaysia (PDRM) sentiasa memantau perkembangan berkait kegiatan keganasan ini secara berterusan setelah mengambil kira perkembangan ancaman keganasan secara global. Sehubungan itu, selain daripada penguatkuasaan undang-undang terutamanya Akta Kesalahan Keselamatan (Langkah-langkah Khas) 2012, Kerajaan telah melaksanakan beberapa tindakan bagi mengekang penularan perkembangan Daesh seperti berikut:

- 1) Secara berterusan telah mengadakan kerjasama daripada segi perkongsian maklumat dengan agensi-agensi perisikan luar negara khususnya negara-negara ASEAN. Hasil daripada perkongsian maklumat ini, pihak Polis telah membuat pemantauan rapi dan menjejaki mereka yang disyaki atau didapati terlibat dengan kumpulan-kumpulan pengganas;**

- 2) Nama individu-individu yang disyaki sebagai pengganas yang diperolehi hasil daripada perkongsian maklumat ini akan dipanjangkan kepada Jabatan Imigresen Malaysia untuk disenaraihitamkan dan dimasukkan ke dalam Senarai Syak (*Suspect List*) bagi menyekat pergerakan mereka di semua pintu masuk / keluar pemeriksaan imigresen di seluruh negara;**

- 3) Kerajaan juga sedang dalam usaha untuk melaksanakan *Advanced Passenger Screening System (APSS)* yang merupakan saringan awal ke atas pelancong untuk memasuki negara ini sebelum berlepas daripada negara asal. Ini untuk memastikan bahawa setiap warganegara asing yang ingin memasuki negara ini dapat ditapis dengan lebih awal dan terperinci;
- 4) Kerajaan dengan kerjasama Badan Bukan Kerajaan (NGO) telah menjalankan pelbagai program penerangan sebagai pencegahan melalui ceramah-ceramah, khutbah jumaat, perjumpaan, seminar, penerangan melalui surat khabar dan lain-lain medium termasuklah media sosial untuk disasarkan kepada golongan-golongan tertentu bagi menerangkan konteks jihad sebenar dan bahaya fahaman ekstrim yang menjurus ke arah kegiatan militan;
- 5) Program penerangan kepada golongan belia seperti Program Belia Benci Keganasan diadakan dengan kerjasama NGO dan Polis DiRaja Malaysia kepada para pelajar sekolah, universiti dan NGO;
- 6) Selain itu, kerjasama antara pihak polis dengan Suruhanjaya Komunikasi dan Multimedia Malaysia (SKMM) juga telah dipertingkatkan bagi memantau media-media sosial yang menjadi medium komunikasi golongan belia agar perkembangan pengaruh Daesh dapat dikekang; dan

- 7) Memastikan mereka yang ditahan menjalani program pemulihan melalui Modul Pemulihan Bersepadu yang dijalankan dengan penglibatan agensi-agensi kerajaan seperti pihak polis, Jabatan Penjara Malaysia, Kementerian Dalam Negeri sendiri serta Jabatan Kemajuan Islam Malaysia (JAKIM).**

Berhubung dengan elemen kumpulan pengganas Daesh yang telah diambil tindakan pula, sehingga 7 Oktober 2016 seramai 255 orang elemen kumpulan pengganas Daesh telah ditangkap oleh pihak polis. Tangkapan ini berjaya dilakukan hasil kerjasama pelbagai pihak melalui perkongsian maklumat antara agensi dan maklumat-maklumat daripada orang awam.

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN

**DARIPADA : YANG BERHORMAT DATUK JUMAT BIN
IDRIS [SEPANGGAR]**

SOALAN :

YB Datuk Jumat bin Idris [Sepanggar] minta PERDANA MENTERI menyatakan :-

- (a) apakah Kerajaan pusat mempunyai hasrat untuk mengkaji semula perjanjian Malaysia 1963 terutamanya perkara-perkara berkenaan hak-hak dan juga autonomi negeri Sabah sepertimana yang dilaung-laungkan oleh rakyat Sabah pada ketika ini; dan
- (b) apakah respon Kerajaan mengenai isu pengembalian hasil cukai 40% kepada negeri Sabah.

SULIT

JAWAPAN: YB DATO' SRI AZALINA BINTI DATO' OTHMAN SAID

MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, Yang Amat Berhormat Perdana Menteri semasa merasmikan pelancaran Bulan Kebangsaan dan Kempen Jalur Gemilang 2015 di Kuching pada bulan Ogos 2015 yang lalu telah mengumumkan untuk lebih banyak kuasa pentadbiran membabitkan jabatan dan agensi persekutuan bakal diserahkan kepada kerajaan Negeri Sabah dan Sarawak dalam usaha merangsangkan pembangunan di kedua-dua negeri ini.

Seterusnya, perincian utama pemberian autonomi atau penurunan kuasa (*empowerment*) kepada kerajaan Negeri Sabah dan Sarawak tersebut telah diumumkan oleh Perdana Menteri pada 16 September 2015 yang melibatkan penurunan kuasa secara pentadbiran dan berperingkat kepada kerajaan Negeri Sabah dan Sarawak.

Pelaksanaan penurunan kuasa secara pentadbiran dan berperingkat tersebut adalah berdasarkan ketetapan-ketetapan yang diperuntukkan dalam Perlembagaan Persekutuan dan undang-undang Negara dan akan tertumpu kepada fungsi-fungsi operasi dan pentadbiran tanpa melibatkan pindaan kepada Perlembagaan Persekutuan atau mana-mana undang-undang Negara yang berkaitan, termasuklah perkara-perkara yang telah disenaraikan dalam Senarai Persekutuan, Negeri dan Bersama.

SULIT

Dalam hal ini, pemberian penurunan kuasa secara pentadbiran sedang diteliti dengan terperinci oleh Jawatankuasa Bersama Mengkaji *Empowerment* Secara Pentadbiran Kepada Kerajaan Negeri Sabah dan Sarawak. Jawatankuasa Bersama ini ditubuhkan oleh Kerajaan bagi mengkaji perkara yang boleh dan akan diberi penurunan kuasa secara pentadbiran kepada kerajaan Negeri Sabah dan Sarawak.

Selain pelaksanaan penurunan kuasa kepada kerajaan Negeri Sabah dan Sarawak tersebut, pada 11 Mei 2016 Jemaah Menteri telah bersetuju supaya pelaksanaan *devolution of authority* kepada kerajaan Negeri Sabah dan Sarawak dilaksanakan berpandukan kepada hak-hak serta kuasa autonomi yang diperuntukkan di bawah Perlembagaan Persekutuan kepada Negeri itu dan bersetuju bahawa Yang Berhormat Dato' Sri Anifah bin Aman, Menteri Luar Negeri dan Yang Berhormat Datuk Hajah Nancy binti Haji Shukri, Menteri di Jabatan Perdana Menteri bersama-sama dengan Jabatan Peguam Negara, meneliti semua hak serta kuasa autonomi yang diperuntukkan di bawah Perlembagaan Persekutuan kepada Sabah dan Sarawak termasuk dari segi peraturan-peraturan sedia ada dalam pelaksanaan *devolution of authority* kepada Sabah dan Sarawak.

Susulan daripada keputusan Jemaah Menteri itu, suatu mesyuarat yang dipengerusikan secara bersama oleh Yang Berhormat Dato' Sri Anifah bin Aman, Menteri Luar Negeri dan YB Datuk Hajah Nancy binti Haji Shukri, Menteri di Jabatan Perdana Menteri telah diadakan pada 13 Jun 2016. Mesyuarat telah membincangkan mengenai pelaksanaan *devolution of authority* kepada kerajaan Negeri Sabah dan Sarawak dan telah membentuk Jawatankuasa Pemandu dan Jawatankuasa Teknikal untuk tujuan ini. Jawatankuasa Pemandu dan

SULIT

Jawatankuasa Teknikal yang ditubuhkan tersebut dianggotai oleh wakil kerajaan Negeri Sabah dan Sarawak dan wakil Kerajaan Persekutuan.

Proses pelaksanaan *devolution of authority* ini merupakan suatu proses yang berterusan (*ongoing*) dan rundingan dengan pihak-pihak yang berkenaan masih dijalankan. Memandangkan rundingan sedang giat dijalankan dan belum dimuktamadkan, butiran terperinci mengenai Mesyuarat yang telah diadakan belum boleh didedahkan kepada umum.

Kedua-dua proses penurunan kuasa dan *devolution of authority* yang sedang dilaksanakan ini membuktikan keseriusan dan komitmen Kerajaan Persekutuan dalam mencari langkah penyelesaian yang terbaik bagi isu yang telah dibangkitkan oleh kerajaan Negeri Sabah dan Sarawak. Ini menunjukkan bahawa ruang untuk menyuarakan apa-apa isu yang berbangkit sentiasa terbuka bagi rakyat Negeri Sabah dan Sarawak dan Kerajaan Persekutuan bersedia untuk mengadakan rundingan dan perbincangan demi kepentingan rakyat Negeri Sabah dan Sarawak secara amnya.

Sekian. Terima kasih.